



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Ven. Viri Thomæ Malleoli A Kempis, Canonici Regvlaris
Ordinis D. Avgvstini. Opera Omnia**

Thomas <von Kempen>

Dvaci, 1625

De inuocatione sancti nominis Iesu & beatæ Mariæ Virginis matris eius.

[urn:nbn:de:hbz:466:1-45790](https://nbn-resolving.org/urn:nbn:de:hbz:466:1-45790)

3. Sit tibi proinde lectulus tuus sine plumis, in memoriam sanctæ natiuitatis Domini nostri Iesu Christi, quasi angustum & pauperulum præsepe, virtutibus plenam; in quo puer Iesus vagabatur in cunabulis, pannis inuolutus, modico sceno pro serico pallio tectus, paruoque lacte matris virginis refectus. Sit duritia & vilitas culcitæ tuæ, recordatio quædam duri & lapidei sepulchri Domini nostri Iesu Christi pro te crucifixi & verè mortui, & in corde terræ sepulti ac grandi lapide clausi. Hic ergo in pace Christi quiesce, omnium oblitus quæ sunt in mundo; omnia reputans vilia & pro nihilo, quæ magna videntur & iucunda; ut cum resurgas nunc in virtutibus & gratia, & in nouissimo die cum electis in gloria sempiterna. Amen.

CAPVT XIII.

De inuocatione sancti nominis Iesu & beatæ Mariæ Virginis matris eius.

Psal. 5.

1. **D**irige Domine Deus meus, in conspectu tuo viam meam. Via tuæ Domine Iesu Christe, via pulchræ, viæ mundæ & securæ, ad ambulandum in eis rectè & perfectè. Et omnes semitæ tuæ pacificæ & sanctæ, ad perducendum omnes fideles tuos & humiles corde, in regnum tuum cæleste. Vbicumque ergo pergis, ambulas, stas, & resides, inuoca Iesum & Mariam piam matrem eius, & hunc sanctum versiculum libenter pro conductu viæ lege; *Dirige Domine Deus meus, in conspectu tuo viam meam.* Deinde consimiliter istum adde: *Perfice, pie Iesu, gressus meos in semitis tuis, ut non moueantur vestigia mea,* ad videndum vana & loquendum otiosa, animæ meæ nociua.

Psal. 16.

2. Post hæc etiam, hunc dulcem versiculum pro viatico ciborum assume, & quasi baculum in manu firmiter tene, & sepe orans deuotè lege: Iesus & Maria, sint mecum semper in via, in omni loco, & in omni tempore, pro bona custodia: ne fortè per devia errem, & dispergar per multa phantasmata intus & extra. Hæc sancta oratio, Iesus & Maria, breuis est ad legendum, leuis ad portandum, facilis ad tenendum, dulcis ad cogitandum, fortis ad protegendum, fidelis ad custodiendum, socialis ad ambulandum, delectabilis ad recreandum, amicabilis ad consolandum, potens ad adiuuandum, prudens ad perducendum recto itinere omnem pauperem peregrinum & sæculi contemptorem, ad vitam æternam. Hæc sancta oratio habet secum meliores comites & potentiores milites, præ omnibus regibus & principibus mundi; & altiores sanctos, præ omnibus sanctis in cælo & in terra. Hæc sancta

Haec oratio trahit ad se in feruore spiritus totam caelestem curiam, quae sequitur cum omni reuerentia Dominum suum Iesum Christum, & dominam suam sanctam Mariam, matrem Iesu benedictam, omni laude dignissimam, ab omnibus honorandam. Qui illos pro socijs secum habet in via huius vitae, etiam pios patronos inueniet mortis tempore. Noli iam ipsos deserere, si cupis cum Iesu & Maria semper viuere & gaudere. Bene ergo & securè ambulat, qui Iesum & Mariam in corde portat, ore saepe nominat, labijs benedicit, manibus plaudit, pedibus tripudiat, voce clamat, corde iubilat, oculis plorat, vultu suspirat, osculis placat, brachijs amplectitur, & flexis genibus adorat.

3. Beatus, qui IESUM & MARIAM sedulo inuocat, deuotè salutatur, amorosè commemorat, eximie honorat, latissime collaudat, altissime glorificat, ardentissime amat, suauissime eructat, iucundissime celebrat & cantat. O quam dulcis est Iesus, & quam dulcis sancta Maria, dilecta mater eius. Beatus peregrinus, qui in omni loco & tempore exilij sui in corpore, meminit patriae caelestis, vbi Iesus & Maria gaudet pariter, cum omnibus angelis & sanctis suis in maxima laetitia & aeterna gloria. Beatus peregrinus, qui non querit mansionem in mundo, sed cupit dissolui & esse cum Christo in caelis. Beatus pauper & mendicus, qui quotidie transit pro pane caeli; & donec accipiat vnam micam, non cessat supplicare humiliter ante Dei mensam. Beatus qui vocatur ad coenam agni; & donec perueniat ad conuiuium supernum, accipit eius sacramentum.

4. Quoties enim aliquis deuotè communicat, aut sacerdos ad honorem Dei reuerenter & deuotè celebrat, toties cum benedicto Iesu & benedicta matre eius spiritaliter manducat & bibit. Iste est discipulus Iesu, capellanus beatæ Mariæ Virginis, socius Angelorum, conciuus Apostolorum, domesticus Dei, cognatus sanctorum, amicus caeli. Hic turbas fugit, fabulas vitat, verba Iesu cogitat, & cor suum cum caeteris sensibus suis sollicitè custodit; ne Iesum & Mariam & omnes sanctos offendat. Hic accipiet benedictionem & misericordiam à Domino Iesu salutari suo; & quam citò ad eum clamauerit, exaudiet eum de caelo sancto suo, in quocumque loco fuerit & periculo. Nam cum discipuli in mari nauigarent, & præ timore submergendi Iesum inuocarent, statim ipse Iesus affuit, & dixit: *Quid timidi estis? Habete fiduciam: Ego sum, nolite timere.* Vox enim Iesu, vox dulcis ad consolandum, fortis ad protegendum, iucunda ad laetificandum, benigna ad indulgendum, gratiosa adtribuendum vitam aeternam.

Psal. 27.

Ioan. 6.